

12. november 2003

UKA 2003/165

**Imigassat ethanolimik akullit Kalaallit Nunaanni sananeqarsimasut akitsuutaat  
pillugit  
Inatsisartut inatsisissaattut siunnersuut**

pillugu

**Inatsisartut Akileraartarnermut Akitsuusiisarnermullu Ataatsimiititaliaata**

**ISUMALIUTISSIISSUTAA**

siunnersuutip aappassaaneerreqarnerani saqqummiunneqartoq

Inatsisartut Akileraartarnermut Akitsuusiisarnermullu Ataatsimiititaliaat  
suliarinninnermini uku-ninnga inuttaqarpoq:

Inatsisartuni ilaasortaq Isak Davidsen (Siumut), siulittaasoq  
Inatsisartuni ilaasortaq Agathe Fontain (Inuit Ataqtigiit), siulittaasup tullia  
Inatsisartuni ilaasortaq Jensine Berthelsen (Atassut)  
Inatsisartuni ilaasortaq Per Skaaning (Demokraatit)  
Inatsisartuni ilaasortaq Ole Thorleifsen (Siumut)

Inatsisartut Akileraartarnermut Akitsuusiisarnermullu Ataatsimiititaliaata UKA  
2003/165 UKA 2003-mi siullermeerneqareermat nassuiaatit ilanngullugit  
misissuataarppaa: Imigassat ethanolimik akullit Kalaallit Nunaanni sananeqarsimasut  
akitsuutaat pillugit Inatsisartut inatsisissaattut siunnersuut.

**Tusarniaanermut akissutit**

Aallarniutigalugu ataatsimiititaliamit maluginiarneqarpoq siunnersuut pineqartoq  
ulloq 5. september 2003, ulloq 19. september 2003-mut tusarniaaneq killilerlugu,  
tusarniaassutitut nassiuunneqarsimasoq. Tunngaviusumik isigalugu tusarniaanermut  
killiliineq sivisunerusimangimmat ataatsimiititaliap pitsaanngitsutut isigaa,  
Naalakkersuisullu kaammattussallugit tusarniaavigineqarsinnaatitaasut siunissami  
piffissaqartilluarlugit akissuteqarnissamut sapaatip akunnerinik sisamanik  
piffissalerneqartassasut.

Siunnersuutip matumani pineqartup ataatsimiititaliamit suliarineqarnissaanut atugassatut tusarniaanermi akissutinik ataatsimiititaliaq piniarsimavoq. Siunnersuut Inuussutissarsiornermut Pisorta qarfirmut, Peqqissutsimut Pisorta qarfirmut Aningaasaqarnermullu Pisorta qarfirmut tusarniaassutigalugu nassiunneqarsimavoq. Ataatsimiititaliap taamaalilluni paasisinnaavaa Nuuk Imeq tusarniaavigissallugu Naalakkersuisut pisariaqartutut isigisimannikkaat. Siunnersuut aaqqiinerinnaalluni Nuuk Imeq-up Unammilleqatigiinnermullu Ataatsimiititaliap akornanni eqqartuussivikkoortumik suliamut sunniuteqartussatut Naalakkersuisunit isigineqanngimmat tamanna ajornartorsiutissartaqartutut ataatsimiititaliamit isigineqanngilaq.

Inatsisissatut siunnersuummut nalinginnaasumik nassuiaatini atuarneqarsinnaavoq tusarniaanermi akissutinik pissarsiat inatsisissatut siunnersuummut ilanngullugit naatsorsuutigineqarsimasut. Ataatsimiititaliamilli suliarinninnissaq sioqqullugu Akileraartarnermi Pisorta qarfik Inatsisartut Akileraartarnermut Akitsuusiisarnermullu Ataatsimiititaliaannut allakkatigut nalunaaruteqarpoq Akileraartarnermi Pisorta qarfiup siunnersuummik suliarinninneranut Inuussutissarsiornermut Pisorta qarfirmut akiliummik aalajangersaasoqarnissaanik kaammattuut ilanngullugu naatsorsuutigineqarsimanngitsoq, akileraartarnermummi akitsuusiisarnermullu tunngasut pillugit oqartussanit suliarinninnermut atatillugu ataatsimut isigalugu akiliummik akiliisitsiniartoqarneq ajormat.

Ataatsimiititaliattaq paasivaa § 6, imm. 2-p, ima oqaasertallip "*Naatsorsuineq maleruagassat Akileraartarnermi Pisorta qarfirmut aalajangersarneqarsimasut naaportorlugit sukumiisumik suliarineqassaaq*" ima oqaasertaqalerluni "*Naatsorsuineq maleruagassat Naalakkersuisunit aa-lajangersarneqarsimasut naaportorlugit sukumiisumik suliarineqassaaq*" (ataatsimiititaliap ataatigut titagai) allangortinneqarnissaanik Inuussutissarsiornermut Pisorta qarfiup kaammattuutaa inatsisissatut siunnersuummi ilaannakuusumik naatsorsuutigineqarsimasoq, allannguummi § 6-imut nassuiaatinut ilanngullugu naatsorsuutigineqarsimanngitsoq. Ataatsimiititaliarli ima paasinnippoq taamatut aaqqiineq ilanngunneqanngikkuni sunniuteqangaassanngitsoq, taamaalillunilu Inatsisartuni inatsisissatut siunnersuutip suliarineqarnerata ingerlateqqinneqarneranut kinguneqaateqartariaqarani.

### **Siunnersuutip imarisai**

Ullumikkut niuerfinnut annikitsunut allaat imigassamik ethanolimik akulimmik immiornissap ajornarunnaarsimaneranik siunnersuut tunngaveqarpoq. Assersuutigalugu immiaaqqat "immiorfeeqqanik" taaneqartartut atorlugit tunisassiarineqartut pineqarsinnaapput. Naalakkersuisullu naatsorsuutigaat tunisassiorfik piffissaq sivisunngitsoq piffissaralugu pilersinneqarsinnaassasoq.

Imigassat ethanolimik akullit Kalaallit Nunaanni immiorneqartut siunnersuut malillugu literimut ataatsimut annertussusia tunngavigalugu ethanolimik akulittut imigassanut ullumikkut atuuttup angeqataanik akitsuusiivigineqassapput, tak. nioqqutissanik eqqussuinermi akitsuutit pillugit Inatsisartut inatsisaanni nr. 19, 30. oktober 1992-imeersumi § 1, nr. 3, kingusinnerusuk allannguutai ilanngullugit. Taamaalilluni assersuutigalugu immiaaraq literimut ataatsimut 4,50-mik

annertussusilik literimut ataatsimut 18,45 kr.-inik, allatulluunniit oqaatigalugu puiaasaaqqamut 33 cl.-itut imalimmut ataatsimut 6,15 kr.-imik, akitsuusiivigineqassaaq.

Naalackersuisut naatsorsuutigingilaat siunnersuut iluanaarutigut sunniuteqassasoq, Kalaallimmi Nunaanni ethanolimik akulinnik imigassanik immiukkat annertoqataannik Kalaallit Nunaannut eqqussukat ikileriassasut naatsorsuutigineqarmat.

Ataatsimiititaliaq **isumaqatigiittoq** siunnersuut pillugu ima oqaaseqassaaq:

Siunnersuut iluarisimaarlugu ataatsimiititaliamit naliliivigineqarpoq.

Ataatsimiititaliaq ima paasinnippoq Naalackersuisut siunnersuut atorlugu teknologiikkut atugassarisanut periarfissanullu nutaanut inatsit naleqqussarniaraat. Ataatsimiititaliaattaq pingaartutut isigaa unammilleqatigiinnermi atugassarisat assigiiaartut inuussutissarsiornikkut suliniuteqarnernut tunngaviusarnissaat siunnersuutikkut pilersinniarneqarmat.

**Taamaalilluni siunnersuut Inatsisartunit akuersissutigineqassasoq ataatsimiititaliamit isu-maqatigiittumit inassutigineqarpoq.**

Taama oqaaseqarluni Inatsisartut Akileraartarnermut Ataatsimiititaliaata inatsisissatut siunnersuut aappassaaniigassanngortippaa.

Isak Davidsen (S),  
siulittaasoq

Agathe Fontain (IA)

Jensine Berthelsen (A)

Per Skaaning (D)

Ole Thorleifsen (S)